



Inatsisartunut ilaasortaq
Jens NapätôK, Naleraq

§ 37 naapertorlugu apeqqummut nr. 152/2026-mut akissut

Asasara Jens NapätôK

Inatsisartut suleriaasianni § 37-mi, imm. 1 naapertorlugu Naalakkersuisunut apeqquteqarputit. Apeqqutit uannut akisassanngorlugit innersuussutigineqartut qujassutigaakka. Apeqqutit issuarneqartarput tamatumalu kingorna akineqarlutik.

Ulloq: 25-08-2026
Suliap normua: 2026 - 14278
Allagaatip normua: 26713403

Postboks 1160
Oqarasuaat: 34 50 00
Fax: 34 55 05
3900 Nuuk
Email: pn@naaq.gl
www.naalakkersuisut.gl

1. **Naalakkersuisut paasissutissiissutigisinnaavaat, Københavni kalaallit napparsimasut pillugit napparsimasunut siunnersortinik peqalernissaa pillugu siusinnerusukkut nalunaaruteqartoqarsimanersoq? Taamaappat, qaqugu sumilu tamanna nalunaarutigineqarpa?**

Akissut

Apeqqut napparsimasunut siunnersuisarneq pillugu aqqissuussinissamut tunngasoq Inatsisartuni oqaluuserineqareernikuuvoq. Tamatumani allannguutissatut siunnersuut napparsimasunut siunnersuisartut ikinnerpaamik marlunnik amerlineqarnissaannut, taakkunanngalu aappaata Kalaallit Peqqissartut Illuanni atorfinitsinneqarnissaanut tunngasoq Inatsisartut UPA2024-mi ataatsimiinneranni saqqummiunneqarpoq.

2. **Københavni kalaallit napparsimasut pillugit, napparsimasut siunnersortissaannik aqqissuussinissamut tunngatillugu maannakkut killiffik qanoq ippa, qanorlu aqqissuussineq atuutilersinneqarnissaa naatsorsuutigineqarpa?**

Akissut

Peqqinnissaqarfik napparsimasunut siunnersorteqarnermik innuttaasunut tamanut atorneqarsinnaasumik ingerlataqarpoq. Aammattaaq Kalaallit Peqqissartut Illuanni najugaqartut siunnersorneqarnikkut, isumaginninnikkut tapersersorneqarnikkut kiisalu oqaatsitigut ikiorserneqarnikkut sullissivigineqarsinnaapput, sullissinerlu Kalaallit Peqqissartut Illuannit aammalu Peqqinnissaqarfiup napparsimasunut angallassinermullu ataqatigiissaarisarfianit isumagineqartarpoq.

Napparsimasunut siunnersuinnermut tunngasuni suliassat nalinginnaasut sulisunit peqqissaanermik, isumaginninnikkut siunnersuinnermik oqaluttaanermillu piginnaasalinnit arlaqartunit ullutsinni isumagineqartarput. Tassa tamatumani suliassat sulisunit ataasiinnaanngitsumit arlaqartunilli Danmarkimi Kalaallit Nunaannilu napparsimasunut ikorfartuinnermik suliaqartuusunit isumagineqartarput.

Naalakkersuisut napparsimasunut siunnersuisartut amerlineqarnissaannik paasissutissanik nutaanik Peqqinnissaqarfimmit qanittukkut anngussivigineqarnikuunngillat. Napparsimasulli isumannaatsuunissaannut tunngavigisap ilaatigut naammagittaalliutinik suliarinninnermi paasisat nutaat tunngavigalugit sutigut tamatigut pitsanngorsarneqarnissaa Naalakkersuisut kissaatigaat, aamma Peqqinnissaqarfik tamatumunnga tunngatillugu suut pisariaqartinneqarnersut sutigullu ineriartortitsisoqartariaqarnersoq ataavartumik tusarniaaffigisarpaat.

- 3. Napparsimasut siunnersortissaannik aaqqissuussineq suli pilersinneqarsimanngippat, suna pissutigalugu pilersinneqarsimanngila, aammalu suut kinguaattoornermut pissutaappat?**

Akissut

Apeqqu 2-mut akissuteqaat innersuussutigineqarpoq.

- 4. Napparsimasut siunnersortissaannik aaqqissuussineq atuutilersinneqanngikkallartillugu, Naalakkersuisut qanoq ilillutik qulakkiissavaat Københavnimi kalaallit napparsimasut kiisalu ilaqutaasa pisariaqartitaminnik siunnersorneqarnissamut, ikiorneqarnissamut aammalu ingerlatsinermut tunngatillugu tapersersorneqarnissamut periarfissaqarnissaat?**

Akissut

Kalaallit napparsimasut qanigisaallu Kalaallit Peqqissartut Illuatigoortumik Peqqinnissaqarfitsigoortumillu siunnersorneqarnissamut, ikorfartorneqarnissamut angallanneqarnissamullu tunngasuni ikiorneqarnissamut maanna periarfissaqarput. Tamatumani suliassat sulisunit ilaatigut peqqissaanermik, isumaginninnikkut siunnersuineramik oqaluttaanermillu piginnaasalinnit isumagineqartarput.

Kalaallit Danmarkimi peqqissartut pisariaqartissinnaasaat Peqqinnissaqarfiup Kalaallit Peqqissartut Illuatalu akornanni oqaloqatigiissutaapput. Tamatumunnga tunngatillugu maanna neqeroorutaasut ikorfartuutaasulluunniit naammannersut ilasariaqarnersulluunniit ataavartumik nalilerneqartarpoq.

Apeqqu 2-muttaaq akissut innersuussutigineqarpoq.

- 5. Naalakkersuisut Kalaallit Nunaanni peqqinnissaqarfimmi siunnersorteqarnerup ammarsarfiisa sivitsorneqarnissaat aammalu innuttaasut siunnersorneqarnissamut periarfissaasa annertusarneqarnissaat eqqarsaatersuutigisimavaat, matumani nalinginnaasumik allaffiup ammarsarfiisa avataatigut siunnersorneqarsinnaanissaq ilanngullugu? Taamaappat, qanoq ittunik aalajangersimasunik eqqarsaatersuutinik imaluunniit pilersaarutinik peqarpa, taamaanngippallu sooq?**

Akissut

Peqqinnissaqarfiup napparsimasunut siunnersuisarfia ulluinnarni ualikkut ataatsip pingasullu akornanni ammasarpoq. Peqqinnissaqarfiup napparsimasunut siunnersuisarfia mailikkut allalluni ulloq unnuarluni aamma attavigineqarsinnaavoq. Siunnersuisarfik aqqissuussaannikkut Peqqinnissaqarfiup ataani inissisimavoq.

Uninngasuttaaq Dronning Ingridip Napparsimmavissuata isumaginninnermut immikkoortortaqarfiatigoortumik (SANA Social) ulluinnarni isumaginninnikkut ikorfartorneqarnissamut periarfissaqarput. Immikkoortortaqarfik taanna ilaatigut uninngasunut inuuniarnikkut ajornartorsiutilinnut ikiuisarfiullunilu oqartussanut suleqatigisanullu atassuteqarfiuvoq. Tassa suliasat timikkut aammattaaq tarnikkut napparsimasunut isumaginninnikkut ilitsersuineramik siunnersuinermillu tunngasut SANA Socialimit isumagineqartarput.

Napparsimasut qanigisaallu Kalaallit Nunaanni Peqqinnissaqarfimmut atassuteqartut siunnersorneqarnissamik ikorfartorneqarnissamillu pisariaqartitsisortaasa taama periarfissaqartitaanissaat pingaartuusoq, Naalakkersuisut arajutsisimanngilaat.

Ammasarfiinut attavigineqarsinnaanerannullu tunngasuni ataavartumik naliliinerit Peqqinnissaqarfimmi pisarput, ilaatigut innuttaasut pisariaqartitaat, suliasat annertussusaat sulisullu naapertuulluarmut siunnersuinissamut suliatigut piginnaasallit amerlassusaat aallaavigalugit.

Naalakkersuisut paasissutissanik Peqqinnissaqarfiup napparsimasunut siunnersuisarfiata oqarasuaataata ammasarfiisa sivitsorneqarnissaannut allaffeqarfiataluunniit nalinginnaasumik ammasarfiata avataatigut siunnersorneqarsinnaanissamik pisariaqartitsisoqarneranut tunngasunik Peqqinnissaqarfimmit qanittukku apuussivigineqarnikuunngillat.

- 6. Naalakkersuisut peqqinnissaqarfimmi siunnersorteqarnerup pisinnaasaasa nukittorsarneqarnissaat aammalu Kalaallit Nunaat tamakkerlugu innuttaasut peqqinnissaqarfimmi siunnersorneqarnissamut pitsaannerusumik periarfissaqarnissaat qulakkeerniarlugu siunnersortinik amerlanerusunik atorfinitsitsinissamik imaluunniit ilinniartitsinissamik pilersaaruteqarpat? Taamaappat, siunnersortit qassit aqqissuussinnermut ilassutigineqarnissaat naatsorsuutigineqarpa, qaqugulu?**


Akissut

Apeqquut 5-imut akissut innersuussutigineqarpoq.

Napparsimasunut siunnersuinermit tunngasuni pisut Peqqinnissaqarfimmit ataavartumik malinnaaffigineqarput, tamatumunngalu tunngatillugu pitsanngorsaanaissaq pisariaqalissappat sulisoqarnermut, isumalluutitut suliniutinullu tunngasuni nalinginnaasumik pilersaarusiornermi ilanngunneqarumaarluni.

Naalakkersuisut napparsimasunut siunnersortinik amerlanerusunik atorfinitsitsinissamik ilinniartitsinissamilluunniit maanna pisariaqartitsisoqarneranik Peqqinnissaqarfimmit ilisimatinneqarnikuunngillat.

Inuulluaqqusillunga

A handwritten signature in blue ink, consisting of a large, stylized 'A' followed by a horizontal line and a small loop.

Anna Wangenheim